

Regional News Unit AIR Aizawl
Saturday, November 16, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Naupang kum 5 hnuai lam pneumonia avanga thi zat chu rampum ngaihtuahin Mizoramah a tam hle a, za zela 19 zet a ni.
- Sorkar laipui scheme PM Vishwakarma hnuai a Mizorama kum khat chhunga dilna lut tawh zawng zawng zat chu 2,109 a a ni.
- Prime Minister Narendra Modia chuan Bodo Peace Accord chu Bodo hnamte tana hlawkna mai nilovin a hnu zela peace accord atan kawng a sial a ni a ti.
- Prime Minister Narendra Modia chuan ni ruk thangin Nigeria, Brazil leh Guyana ah te a zin dawn.



PNEUMONIA

Rampum ngaihtuahin Mizoramah Naupang kum 5 hnuai lam pneumonia avanga thi an tam hle a, za zela 19 zet a ni.

Reproductive and Child Health (RCH) state nodal officer Dr. Lily Chhakchhuak chuan rampuma pneumonia avanga naupang kum 5 hnuai lam thi hi za zela 17 point 5 a nih lai-in Mizoramah chuan za zela 19 a nih avangin titem turin tan lak a ngai nasa hle a ni a ti. Tun hnai a Social Awareness and Action to Neutralise Pneumonia Successfully (SAANS) bul tanna a an sawi danin naupang kum 5 hnuai lam suattu tam ber chu pneumonia natna a nih thu sawi a ni a. Thawhlehi khan World Pneumonia Day-ah SAANS hi hawn tan a ni a, nakum February ni 28 khian khar a ni a. SAANS-in a tum ber chu nakumah chuan naupiang sangkhat zela 3 nunna hum a ni a. Tih hlawhtlin harsa tak tura lang ni mah se, tihpuitlin theih loh chu a nih loh thu an sawi a ni.

SAANS hian nau piang hlim thla ruk an tlin hma a nu hnute tha taka an hnek leh thla 6 hnu a chaw tha an ei a ngai pawimawh hle a. Chu bakah nausen uluk taka enkawl a, pneumonia an vei leh vei loh en thlithlai reng a, a hun taka enkawl chu ngaih pawimawh tur a nih thu an sawi a ni.



CSR

Mizoram sawrkar Corporate Social Responsibility Cell chuan United Nations Development Programme (UNDP) nena tangkawpin tunkar chhung khan Mizoramin hmasawna hnathawhna tur CSR Fund tam zawk a hmuh theihna tur dapin Bangalore-ah hun an hmang.

A ni hmasa berah CSR Cell te hi IIM Bangalore-a NSRCEL leh NASSCOM startup hub hotute nen an inkawm a. Mizoramin sustainable development goals tihlawhtling tura a ruahmanna leh chumi atana CSR pe thei pawlte thawhpui an mamawh dan an sawipui. Heng pawl lian pahnihte hian Mizorama startup sector lo thang lian chho meka hma lak ve an chak thu leh state hmasawn zelna atana kawng thar tam tak (innovative solutions) dap theih an inring a ni.

A ni hnihnaah hian UNDP te nena tangkawpin CSR fund pe chhuak thin private sector, corporate foundation, philanthropic group leh CSO aiawh mi 40 vel nena inkawmna (stakeholder consultation) an buatsaih leh a. Zirna, skill development, employment, entrepreneurship, women's empowerment, health, sports leh climate change lamah te sum tlem zawk seng a; tunlai thiamna hmanga awmze nei zawka hmalak theih dan an sawiho.

CSR Cell hotu Adviser to CM Pu TBC Lalvenchhunga chuan, Mizoram chu hun rei tak India ram state zinga CSR dawng tlem ber a ni tawh a. CSR hmang hian hmasawmna hna tha tak tak thawh theih a nih avangin, Chief Minister Pu Lalduhoma chuan mimal company leh civil society organisation te nena thawhhona tam zawk neih tumin CSR Cell hi a din a ni a ti.

Regional Head, South India, UNDP Pu Jeya Chandran chuan State sawrkarin a ruahmanna tihlawhtling tura hetiang zawnga hma a lak an hriat wawi khatna a nih thu leh Mizoram CSR Cell hian danglamna (change) thlen kawngah midangte tan pawha entawntlak thil a ti a ni" tiin CSR Cell te hmalakna hi a fak a ni.



PM VISHWAKARMA

Sorkar laipuiin kut themthiamte leh thilsiam thiamte tanpuina leh khaichhuahna atana a duan, PM Vishwakarma hnuai a Mizorama kum khat chhunga dilna lut tawh zawng zawng chu 2,109 a a ni.

PM Vishwakarma Consultant Pi Betsie K. Vanlalpeki chuan he hmalakna-in a tum ber chu kutthemthiamte thiamna hriatpui a, tanpui a ni ber a ti a. Hetah hian India ram puma kut themthiamte tan trade 18 thlanchhuah a ni a, heng zingah hian Mizoramah trade 3 – mistiri, puanthui leh lumeh thlang an tam ber a. He tanpuina dawng thei te hi kum 18 leh chunglam zawng te an ni ang a, an trade thlante hmanga mahni a eizawng lai an ni tur a ni.

Kan corr report lo ngaithla ang.

Heng trade thlang te hian loan chhawng 2 – cheng nuai 1 an dawng phawt ang a, a dawtah cheng nuai 2 an dawng thei leh tura ruahman a ni. Loan hi a pung a tlem hle a, za a 5 a ni. Loan la duh te tan hian dahkham tur a awm lo a, basic training an kalflang erawh a ngai phawt dawn a ni. An training chhung hian ni khatah stipend Rs 500/- an dawng thin bawk ang.

Pi Betsie chuan scheme hi Mizoramah chuan Commerce and Industries Dept a MSME ten an kalpui mek a, a ngaihven duh tan mahni khua a Common Service Centre (CSC) ah te zawhfiah theih reng a ni tih a sawi a, he ruahmanna hi kum 5 chhung, kum 2028 thleng kalpui tur a nih avangin dil duhte tan ngaihven theih reng a nih bakah he scheme chungchang hi inhrilh pung a, a tam thei ang berin tanpuina dawng se tih chu sorkar duhdan a nih thu a sawi bawk a ni.



PM-EMRS

Prime Minister Narendra Modi-a'n nimina Eklavya Model Residential School (EMRS) a hawn thar zingah Mizorama EMRS pahnih - EMRS Bilkhawthlir (Bilkhawthlir RD Block, Kolasib District) leh EMRS Noahtlah (Siaha RD Block, Siaha District) te a tel.

Hei bakah hian sak belh turah EMRS panga - Lungsen (Lungsen RD Block, Lunglei District), Khawbung (Khawbung RD Block, Champhai District), Khawzawl (Khawzawl RD Block, Khawzawl District), Sawleng (Darlawn RD Block, Aizawl District) leh West Phaileng (West Phaileng RD Block, Mamit District) te an tel bawk a. He hun hi Lunglei bawrsap pisa aṭangin Social Welfare, Tribal Affairs, Women & Child Development Minister Pi Lalrinpuii hovin biakhmuhtheih hmangin an chhim a. Pi Lalrinpuii chuan Mizorama EMRS sikul building thar changtlung tak pahnih hawn a ni leh a dang panga sak leh tur lungphum phum a ni chu lawmawm a tih thu a sawi a. EMRS kal tlangin Mizorama tribal zirlaite'n zirna kawnga hmasawna tluantling an hmuh a, ram puma lang pha a an intar chhuah theih zel a beisei thu a sawi.

EMRS hi chen chilha zirna (residential school) a nih angin zirlaite tan ei leh in, uniform leh zirnaa an mamawh eng kim a thlawn veka pek an nih bakah, national level sports leh cultural activities te neihpui ṭhin an ni a. State dang EMRS-te nen India ram khawpui hmun hrang hrangah hun hman ho ṭhin a ni.



PM DAJ-GUA

Tlangmite chenna thingtlang khua tih hmasawna tur ruahmanna, DHARTI AABA JAANJATIYA GRAM UTKARSH ABHIYAN chu nimin tuk khan hawn a ni.

Prime Minister Narendra Modi hawn tak PM DAJ-GUA hi Social Welfare & Tribal Affairs bultumin, Chief Secretary Pu H. Lalengmawia chuan a tlangzarh a. Pu H. Lalengmawia chuan hmasawna rualkhai siam turin sorkar laipuiin thingtlang khua a ngai pawimawh tih a sawi a, ruahmanna awmsa engemaw zah chak lehzual a kalpuina tur a tih a nih avangin state, district leh block level-a sorkar a mawhphurna neite inkarah thawhhona leh tanrualna tha neih a pawimawh thu a sawi. Chief Secretary chuan he ruahmanna hi a nihna tur tak a hman a nih theih na'n leh hlawhtling tak a kalpui a nih theih na'n kawng hrang hranga mawhphurna changtute'n uluk tak a zirchiang turin a chah a. Mizoram tana hmasawna tluantling thlentu hmanraw tangkai a hmang turin kalkhawmte a fuih bawk a ni.

PM DAJ-GUA Scheme hi kum 5 chhung kalpui tur a ruahman niin India ram a thingtlang khua 63,843 tuam tur a duan a ni a. Mizoramah khua 383 a tuam tel ve dawn a, ruahmanna kalpui na'n hian ram pumah cheng vaibelchhe 79,156 ruahman a nih thu tarlan a ni. Hmasawna kalpui tur a huam hrang hrang zingah hmasawna ruangam thar bun te, thingtlang khawsak dinhmun chawikante, zirna leh mipui hriselna tih hmasawn te a tel a ni.

Lunglei district-ah chuan Social Welfare & Tribal Affairs minister Pi Lalrinpuii'n PM DAJ-GUA hi a hawng a. Hmasawna ruhrel thar din leh siam chhuah lam aiin a tlabal lai thawm ṭhat chu PM DAJ-GUA-in a tum a nih thu sawiin, Lunglei District bikah khaw 48 thlan chhuah a nih thu leh he'ng khaw thlan chhuah aṭang hian khaw 6-ah chuan PMAAGY kal tlangin hma lak ṭan a nih tawh thu a sawi.

PM DAJ-GUA hi Mizoram district hmunpui dangachte pawh hawna hun hman a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



BODO PEACE ACCORD

Prime Minister Narendra Modia chuan Bodo Peace Accord chu Bodo hnamte tana hlawkna mai nilovin a hnu zela peace accord atan kawng a sial a ni a ti. Nimina New Delhi-a Bodoland Mahotsav ah he thu hi sawiin Pu Modia chuan peace accord avangin Assam-ah ringawt thalai sing chuang ralthuam tungin nunphung pangngai an zawm a ti.

PM Modia chuan Bodoland tihhmasawanna tur hian sarwkar laipui chuan special package cheng vaibelchhe 1500 a pe tawh a ti a. Assam sawrkar pawhin an tan a bikin hmasawanna tur sum a ruahman a ti a. Cheng vaibelchhe 700 chuang hmasawanna ruhrel, zirna leh an hnam zia tihmasawn turin Bodoland-ah hman a ni a ti.



PM

Prime Minister Narendra Modia chuan ni ruk thangin Nigeria, Brazil leh Guyana ah te a zin dawn. A thawh khatnaah hian Pu Modia hian Nigeria a tlawh hmasa ber dawn a. Nigeria President Bola Ahmec Tinubu-a sawmnaa zin tur niin kum 17 chhunga India Prime Minister zinga Nigeria tlawh leh hmasa ber a ni ang.

A cham chhungin sawrkar hotu pawimawh tak takte nen an inkawm dawn a. Hei bakah hian Nigeria-a India mi chengte nen hun an hmang dawn bawk a ni.

India leh Nigeria te hian kum 2007 atangin thawhdunna an nei tan a. Eibar zawanna, energy leh ralthuam lamah an thawkdun mek a. Indian company 200 chuangin Nigeria ah hian dollar tluklehdingawn 27 hu sumdawanna an nei mek a ni. Nigeria-a hun a hman zawh hian Brazil a pan leh ang a. Chumi hnuah a hnukung berah Guyana a pan leh ang.

